

10909

測海集卷五

長洲彭紹升允初

思賢詠三

總督姚啟聖熙止

浙江會稽人隸鎮紅旗漢軍康熙二年舉人

熙止初知廣東香山縣坐事免會耿精忠踞福州反寇

浙東康親王統兵渡錢塘熙止散家財募兵迎王王命

攻諸暨復之遂署縣事連破賊陣斬數千人撫偽官四

十餘人兵七千餘人敘功擢溫處道僉事十五年八月

率兵進剿破賊九營抵石塘焚其木城復雲和從大軍

入閩補福建布政使招降賊帥韓大任劉進忠及其衆

數萬十七年五月擢福建總督加兵部侍郎時耿精忠

測海集

卷五

一

已降而海寇鄭錦踞廈門攻掠近海諸州縣熙止遣兵

進剿復平和同安敗賊于泉州十八年正月會平南將

軍賴塔督大兵進戰大敗賊于蜈蚣山斬賊四千人復

長泰乘勝逐北擒斬甚衆降偽總兵廖璵等及其衆一

萬二千人十九年二月水師提督萬正色破鄭錦于海

壇熙止會平南統水陸軍七路並進破十九寨復海澄


錦走歸臺灣取金門廈門先後敘功加太子少保子世職

二十年六月鄭錦死子克塽幼弱熙止密陳規取臺灣

之計用多金閒其黨與誘偽行人傅霖殺之以其爲賊

主謀也初施琅自賊來降積功至福建水師提督已而

入京爲內大臣熙止奏欲平臺灣非琅不可遂復授琅



提督二十二年閏六月琅進兵攻澎湖熙止駐廈門督餉既克澎湖琅爲書咨熙止以臺灣水道紆欲俟八月後乘北風行熙止謂賊已大創乘勝擊之可旦夕下緩之無及矣遂遣官賞賞功銀一萬兩火器弓弩甚具趣琅進兵兵將發而克塽遣使約降熙止以聞請頒 詔赦克塽罪臺灣平是歲卒于官初大兵駐閩中民間頗苦供億熙止三疏請 勅康親王班師報可兵出境多挾民間婦女熙止白王請下令嚴禁竭所儲贖放者二萬餘人方海患亟時 詔徙瀕海民實內地流離失業者衆以熙止請復其故民間往往肖熙止像爲祠生祀之

測海集

卷五

二

戰血灑千山斯人牛魚爛毀家出奇功慷慨輕百戰決勝在知人成功信善斷諒非懷保心誰免流離患

總督吳興祚

正紅旗漢軍

興祚起家縣令康熙初知無錫有善政漕督帥完保薦其才十五年用廷推驟遷福建按察使時耿精忠旣降而明裔朱統錫擁兵阻險爲寇其僞總兵陳龍等結寨光澤山中十六年興祚招降陳龍等使爲導直搗寇穴其黨縛統錫以獻撫其衆三千人十七年擢福建巡撫時海寇犯泉州興祚率標兵赴援連破賊復永春德化賊帥劉國軒遁興祚募水師遣總兵林賢統以出海敗賊于赤澳因請增置水師爲平賊計從之十八年招撫

偽總兵蔡冲珦等及軍民一萬五千人十九年二月會
寧海將軍喇哈達總兵王英等自同安分三路進剿復
廈門金門遂鄭錦入海招僞將軍江機等二十年以功
授世職擢兩廣總督二十一年覆憲臣徐元文條奏粵
東民困一疏因極言鹽埠渡稅總店漁課之害請予豁
除鹽埠者異時尙氏駐粵私縱官丁或占鹽田或奪鹽
埠致商民愁怨課額日虧其病民者一渡稅者粵中渡
口舊有三百八十餘處貨物過者計儋輸稅不過分釐
尙氏更令隸卒羅踞津口重加稅錢又禁他船分載每
年所得不下數萬其病民者二總店者尙氏所創立凡
雞豚蔬果之屬向無稅例者一概截抽至銅鐵木材已

測海集

卷五

三

輪官稅復抽私稅其病民者三漁課者舊額銀五千四
百二十餘兩尙氏加以重斂每歲所入不下數萬其病
民者四尋奉 旨粵地鹽埠渡稅總店漁課悉予豁除
如所請廣州瀕海多曠土招民耕種設兩翼鎮兵分駐
廣韶嚴武備捐金四萬兩建潮州廣濟橋三年乃成商
民便之卒祀名宦祠

治盜若治病攻補兩不偏但當決癰毒慎勿戕其天長波靜
鯨鱈伏莽投戈鋌春風忽相扇那復愁冰堅

知縣陸在新蔚文

江南長洲人康熙五年舉人

蔚文官廬陵知縣之官不攜妻子始至誓于城隍之神
不以一錢自污錢穀耗羨革除都盡常裏糧厯山谷閒

勞苦百姓軫其災患而導之于善三年教化大行以勞
卒其孤嚮書以殮廬陵人爲罷市三日會哭者萬餘人
賢人潔腸胃凍雪寒山岑一朝耀白日美澤流春陰揮手謝
妻子嚮書制棺衾孤英易摧折痛矣斯民心

知縣沈光榮

正白旗
漢軍

康熙中光榮知河南河內縣仁慈莅民催科不事敲扑
設盒酒花帛集諸里長令逋課者跪堂前進酒于他里
長之畢輸者爲簪花被帛鼓吹導以出中門由是輸者
畢至有李家窪者地斥鹵數逋稅光榮爲引溝渠開稻
田招流民復業給以牛穀種改名藏富村其後遂成沃
土每遣衙胥攝事計日給以錢禁不得絲毫擾民在官

測海集

卷五

四

三載而去士民思之祀名宦祠

誰非父母遺何忍爛其肉酌酒跪堂皇辱乃踰敲扑春渠活
活流秋畝年年熟昔日虎而冠今也麟之足

尙書趙申喬慎旃

江南武進人康熙
九年進士諡恭毅

慎旃在官刻苦自厲苟利于民知無不爲起家縣令案
牘皆自治人不能欺官浙江布政使謂欲令州縣無虧
帑當先革藩司陋規故有錢糧加平時節饋送兵餉掛
發奏銷部費諸款一切禁絕僚屬凜凜奉法度藩庫貼
解費歲支不過什五將去任積二千兩有奇悉封識以
授代者曰吾前奏銷不費一文錢後將難繼得此足辦
今歲事矣勿更擾民也四十一年正月遷浙江巡撫十

二月調湖南禁州縣額外加派如軟擡硬駝公費腳價
諸名目盡數革除時苦鹽貴愼旃諭商人盡革諸衙門
陋規自巡撫始司道以下視之令下毋得更高價累民
聖祖累下詔稱爲廉吏第一五十年春遷左都御
史明年因 萬壽恩詔請免官地民房新舊租稅尋
奉使陝西請蠲潼關衛大同府本年應徵米豆草束皆
報明前多 聖祖覽議 聖祖始終保全之卒于位

何以靖官常不欲爲其本天日明心肝苞苴絕幽隱時哉道
大光下益而上損終始拜 恩榮兩字褒華袞

總督郭琇瑞甫

山東鄆人康熙九年進士

瑞甫初爲吳江知縣以湯文正薦試授御史時靳輔爲

測海集

卷五

五

河督累著勞績亦頗交結權貴以自固尋以高寶下河
水漲議築隄束水而湯公及侍郎孫在豐等俱主濬海
口輔不從康熙二十六年瑞甫上疏論輔治河不效

詔以王新命代之二十七年擢左僉都御史二月劾大
學士明珠余國柱結黨納賄罔上正道 聖祖卽下

詔數責諸臣罷斥明珠國柱等朝野大悅累遷左都御
史二十八年疏劾原任少詹事高士奇左都御史王鴻
緒等所爲姦利狀並予休致頃之明珠黨錢珏佛倫先
後爲山東巡撫搆陷瑞甫遂罷去而江寧按察使高承
爵劾瑞甫爲吳江時失察縣丞趙炯私用倉穀赴江寧
就訊獄成當戍陝西 詔特原之放歸田里三十六年

聖祖南巡問吳江民前令孰賢皆稱郭琇賢遂起
爲湖廣總督四十二年以苗疆有警不以聞爲廷臣
所劾削籍歸

附耳煽王廷私門闕王食偉哉郭御史舍命殛奸慝中天照
離明朋亾和萬國清問到江鄉信斯三代直

侍講德格勒

滿州鑲藍旗人
康熙九年進士

康熙朝德格勒官侍講李文貞嘗薦其學行時召見
論經義性骨鯁不附權貴嘗扈駕巡行明珠使人累

千金爲裝卻之會天久不雨聖祖命德格勒筮之

遇史曰澤上于天將降矣一陰居上天屯其膏決之卽
雨聖祖愕然曰安有是以明珠對明珠聞而大惡

測海集

卷五

六

之二十六年冬坐私刪起居注論死赦出謫可尔沁其
部大人以下敬事之旣歿而善視其子孫不衰

斯人屹中流千金唾如芥孚號向王庭擬決一陰史言發
禍已隨志定死不害涼涼緇衣慕縣逸窮荒外

員外達瑞輯菴

姓何舍里旗
州正黃旗人

輯菴初官蘭州筆帖式有土豪徐五奪民閒婦白巡撫
布喀逮治徐以萬金求解于輯菴不許卒還民婦徐五
死獄中遷考功司主事康熙四十三年山東饑選官分

賑吏部尙書陳廷敬舉輯菴往分得平原縣時戶部侍
郎穆和倫總賑務倡言各縣賑口不得過三千輯菴爭

曰平原地大人稠不應限以三千請徧給之是歲他州

縣賑口多不過三千而平原至九千三百有奇又因稽核戶口與同事捐俸市衣錢載以行擇其尤貧者先賑之及賑設五局以便民做下吏之爲姦利者平原民懷之立生祠還遷戶部員外郎

救荒若救火生死爭須與仰屋計羸縮朽骨已載塗誰令施未光一體分菹枯不見平原民焚香頌來蘇

侍郎布泰階平

姓瓜尔佳滿洲正黃旗人

階平官刑部郎中每涖獄不輕用刑訊務求其情康熙二十五年督龍江稅務故事征銀一兩羨二分階平曰此私征也申約束禁斷三十九年授盛京刑部侍郎閱積案多至數百事晝夜詳決不一月而清多所平反旗

測海集

卷五

七

民德之尋以事降官四十一年授察哈爾遊牧總管其俗故憊悍爲之立條約宣教化募內地老農教播種設義倉秋收春賑已而率兵防守推河糧乏日僅一餐爲軍士先糴得不匱少好學既老猶日與諸子講論經史事母謹母沒廬墓三年友其二弟終身不析居

君子如春風所至物訢暢折獄務哀矜安邊資保障疏水有餘甘松楸故無恙一編手自攜老去神猶王

御史陸瓏其稼書

浙江平湖人康熙九年進士諡清獻

稼書知嘉定縣清苦自厲務以德化民民有親屬訟者爲曉譬大義繼以涕泣民多感悔去胥徒千數喻令歸農民宗族相爭命其族長逮之鄉里爭命里正逮之又

自有追牌命兩造要而來催科第爲期限而輸者自集會軍興徵餉十萬稼書爲文勸民以大義不帀月而十萬之數具足其生日老稚千數焚香拜堂下有百歲老人扶杖前願一識爺曰自我爲民以來未見有官如爺者也亾何以盜案免再以大臣論薦起知靈壽縣擢四川道監察御史每有論奏先一夕齋戒以爲常旋以議捐納罷歸老於家雍正元年追贈內閣學士 賜今諡

從祀 文廟

人言大樸雕未可純德化先生所莅民闕遠三代下直道在彤廷封章凜清夜勤勤待後心矻矻歸田暇

學道蔣伊謂公

江南常熟人康熙十二年進士

測海集

卷五

八

康熙十八年謂公官御史時滇閩用兵征調四出又廣開捐納事例謂公繪十二圖以進曰難民曰水灾曰旱灾曰儻兒曰春耕夏耘曰冬獄曰夏獄曰疲驛曰暴關曰讀書曰觀榜曰廢書復爲疏極言其狀請嚴軍政省刑罰慎銓選奏上 聖祖覽之爲動容嗟歎置諸左右又劾江西總督董衛國縱兵虐民狀別爲五疏論救荒之策其言甚切二十二年 駕東巡所過多飢民

聖祖顧近臣曰此蔣伊所繪流民圖也尋出爲廣東糧儲參議革除苛政與民休息日市乾魚自給誓不取民間一物頃之移河南學道以經術造士絕干請頌聲翕然其居鄉好施予放魚鳥諸物歲千萬計其子孫再

世爲相

嗷嗷愴中田深深仰黃屋拜手籲 皇仁耀我光明燭乾
魚佐盤餐一飽良亦足高門日以隆誰使清風續

尚書徐元夢善長

姓舒穆魯渾諸人諱正白旗
康熙十二年進士諡文定

善長初以庶吉士散館列二等當以科道用時索額圖
執政惡其不附已也奏改部屬明珠數欲致之亦不就
試翻譯第一再遷至侍講李文貞掌翰林院薦善長與
德格勒並有學行二人故相善及德格勒以占易見惡
於明珠遂并怒善長會湯文正議董漢臣上書事明珠
誣以怨訕欲并陷二人遂言二人與之結黨 聖祖
乃召諸臣試乾清宮二人與焉有旨誚讓二人命同

測海集

卷五

九

試諸臣校勘其文衆相視無言而湯文正獨右二人既
罷 詔以湯文正輔導 皇太子善長教誨 皇子其

年秋 聖祖御瀛臺教諸皇子射善長不能挽強

聖祖怒因以蜚語詰之善長奏辯 詔答數十籍其

家父母謫黑龍江翼日善長冒雨至宮門跪泥中號泣
訴父母無罪乞代親戍邊有關保者以告 詔立赦其

父母復善長官已而翰林院奏德格勒私刑起居注下
獄 詔并問善長獄成當死 詔鞭一百荷校三月與

妻子並入辛者庫已而以廢官侍 皇子復爲珠黨所
軋幾死者數矣久之明珠既老其黨漸解散而李文貞

日見親信 聖祖久益察善長之爲人累遷內閣學

士出辛者庫康熙五十三年出爲浙江巡撫五十七年授兵部尚書雍正元年攝大學士改戶部尚書尋以在浙時失察呂留良案落職今 上卽位復起內閣學

士遷刑部右侍郎改禮部仍課諸 皇子旋加尚書銜善長平居溫溫遇事持可否甚力始終一節不撓衆枉通懷樂善老而彌篤與桐城方靈臯共直蒙養齋暇卽從問經義有侍衛請靈臯講大學至秦誓其人作而言曰茲所云一个臣者吾視徐公良然乾隆七年卒 詔稱徐元夢學問優裕踐履篤實謂之完人可無愧焉

服藥須去毒于古有放流譖者亦太甚斯人自休休升沈信非我善惡看到頭 玉音布公道鳩鳥空啁啾

測海集

卷五

十

巡撫馬如龍

山西綏德人

康熙十四年逆賊朱龍據延安府以叛如龍時爲舉人家居率壯士守山寨拒之居人從而相保者千餘家賊衆來犯敗之又斬其使賊遂益兵爲長圍會平逆將軍畢力克圖兵且至如龍突圍出迎於河上平逆命爲前鋒大破賊斬首萬餘朱龍以數十騎遁平逆命如龍權綏德知州撫餘賊越二年延安平上還州印請赴禮部試平逆與總督哈占上其功擢知深州在官屢決疑獄宿逆旅有鬼訴冤掘地得骨究問得主名寘之法累遷杭州知府杭民貸于軍期滿不能償以子女質旋沒入如龍白于將軍令悉持券來發官銀給之還其子女民

大悅尋以右副都御史巡撫江西

聖祖南巡淮陽

饑命如龍賑之遂倡僚屬糴米十萬移賑焉四十年卒于官
馬公挺孤劒隻身庇萬人功成乃辭賞志氣何深醇濟物了無我雪冤信如神江淮共安宅一氣旋洪鈞

漕督施世綸文賢

尊侯次子

文賢初知江南泰州廉而強治案牘甚勤康熙二十七年淮安下河被水詔遣兩大臣蒞州督隄工從者數十輩驛騷閭里文賢白其不法者治之是年湖廣兵變援勦官兵過境沿途侵奪文賢具芻糧以應而令人各持一梃列而待有犯者立擒治之兵皆斂手去二十八

測海集

卷五

十一

年擢揚州知府 駕方南巡召對良久顧左右曰此天

下第一清官也尋改江寧府所至民咸懷之以父憂去官乞畱者萬人不得請乃人投一文錢建雙亭于府衙

前名一文亭歲餘起蘇州知府以服未除辭不赴三十九年起淮徐道副使累遷順天府尹總督倉場五十四

年出爲漕運總督五十九年秋陝西旱大饑 廷議輓河南粟二十萬石給關中 詔文賢赴河南勘河南府

至西安黃河運道乃自孟津歷砥柱上龍門由陝州達西安量地險易繕路通阻酌舟運多寡有差遂抵西安

會總督鄂海協理軍餉時州縣積貯多虛耗而西安鳳翔爲甚遂拜疏劾二知府下吏雜治時文賢有子知會

寧鄂海以是要之文賢笑曰吾自入官以來身且不顧
何有于子鄂海竟以失察罷其年冬 詔發帑金五十
萬合陝屬常平倉粟一百三十六萬餘石賑飢民遣
部曹十二人往而文賢總其事文賢因歷陝境分十二
路遣曹官及郡縣能吏十二人按口分給遠近悉徧明
年夏得雨乃歸淮安民間老幼泣送數十里建生祠祀
之六十一年以病卒官

一挺植道旁虎賁悉斂手照影清江流雙亭拜童叟乘槎上
龍門臥聽洪濤吼鼉勉爲蒼生身家復何有

尚書席爾達

滿洲鑲
紅旗人

席爾達爲人廉潔有智略識大體康熙三十八年以兵

測海集

卷五

十一

部尚書權川陝總督先是陝西私派甚重賄賂公行席
爾達奏請禁屬官餽獻言私派累民實由州縣四節餽
獻欲除私派必嚴絕餽獻因分別處分條例以上 詔

部議行遂勒碑衙前申永禁焉四川打箭爐番人蠢動
遣兵進剿破其衆四十年冬甘肅災得 旨賑恤仍請

緩征明年額賦 報可入爲吏部尚書四十二年湖廣

紅苗作亂 詔席爾達統兵南下疾馳至辰州檄貴州

提督李芳述兵自東南來遣副將韓永傑高一靖等率
兵由乾州至崇山衛扼蜀道而親率兵至鎮筵下令招

撫降者踵至遂自遞糧坡入路險賊不設備聞兵至則
駭走遂合諸路兵直搗天星寨寨下削上廣高數百仞

梯引而上苗依以自固我兵攻圍久絕其水道登小天
星寨架礮擊之苗人懼乞降許之先後降者三百餘寨
悉令納刀杖獻戶口冊供賦役爲良民因請乾州設同
知鳳凰營設通判並增防汛官兵移兵備道駐鎮寧鎮
其地苗疆大寧明年三月還京尋卒

南箕翁其舌朽軸日以空誰能屏貪泉部屋流仁風制亂不
在武所貴善始終一朝解兵甲耕鑿還堯封

尙書張廷樞

陝西韓城人康熙二十一年進士

廷樞起翰林累官吏部侍郎康熙四十八年遷刑部尙
書骨鯁持法平時提督九門陶和氣勢方橫滿尙書齋
世武與之比摭其仇入死刑廷樞持不可因搆廷樞罷

測海集

卷五

上三

歸居二年和氣誅世武竄廷樞以戶部尙書召旣至仍
改刑部誠王府人孟尙曾殺甘肅平民事達部誠王再
三屬廷樞勿上奏廷樞卒奏論如律僂人徐采官給事
藩府嘗嗾傭者捶殺人議者欲以傭抵廷樞不可事下
九卿戶部尙書趙申喬據刑部讞論采官主使坐絞已
而卒減死充邊及 世宗卽位下詔褒厲申喬仍逮

采官於邊以殺人抵死河南遠水諸州縣歲徵黃糧輓
運費不貲民甚苦其役巡撫楊宗義請改折色廷議不
可廷樞因使還白其事卒如所請六十一年坐事免歸
刑殺有常憲所守曷可撓恭逢 堯舜君明允推臯陶以

茲浚定力白日流春膏役車謝父老酌酒還魚羔

布政使劉棨弢子

山東諸城人康熙二十四年進士

康熙三十七年弢子知寧羌州時關中大饑州倉無見糧弢子請於監司假廳倉粟以活州民復移粟洋縣持檄往賑數日而畢謂洋令曰此粟貸之官倘及秋民不能償吾兩人可代任之將行老稚持香擁馬首塞路寧羌民多逋稅自賣家中田代之輸母憂去官負債不能行致書其弟令亟賣所遺田弟以兄產薄益以己田易金致兄所寧羌人聞爭輸金爲助弢子示以家書曰吾田已去矣無及也乃止服闋授平陽知府累遷至四川布政使

誰人愛身家不若愛榮獨榮獨息哀嗷我心貧亦足來道漫

測海集

卷五

十四

焚香空倉已無粟壘簾不孤鳴好把家書讀

尚書張伯行孝先

河南儀封人康熙二十四年進士諡清恪

康熙四十六年孝先巡撫福建四十九年移江蘇其在

官悉以家私財充用未嘗受人一錢急民之病而除其

隱建書院刊布先儒遺書遵禮耆儒延接後輩以昌明

正學爲己任五十年江南省試榜發副主考趙晉以賄

聞衆大譁正主考左必蕃不得已上其事 聖祖命

戶部尚書張鵬翮會督撫卽訊總督噶禮居奇接貨不

欲窮治孝先上疏劾之噶禮亦以他事許孝先 詔二

人俱解官聽勘復 命戶部尚書和穆倫工部尚書張

廷樞會訊然皆畏噶禮謂其所劾有據坐孝先落職

詔責諸臣顛倒是非暴噶禮罪斥之復孝先官尋坐事
免 召入授戶部侍郎總督倉場雍正初遷禮部尚書
卒於官孝先論學恪守程朱嘗仿論語編濂洛關閩書
進於 朝其遺澤多在蘇州蘇州人至今思之

鴛鴦嚇桐鳳白日塵冥冥

一人握虛鑑萬影無逃形昂

首奮臣節曲肱誦遺經景行未蕪沒宛在春風亭

張公在蘇創紫陽書

院院有春風亭

檢討竇克勤敏修

河南柘城人康熙二十七年進士

敏修少勤學稍長徧治諸經聞耿介石傳蘇門孫徵君
之學教授嵩陽書院往從之游居五六年入京應禮部
試謁湯文正公日夕請業錄其語以自檢文正謂師道

測海集

卷五

五

不興由教官之失職也勸敏修就教職得泌陽教諭泌
陽地小而荒人鮮知學敏修爲立五社設之師各置規
過勸善簿月朔稽善過而勸懲之又立童子社授以孝
經小學次及四書五經暇則齋居讀書餽粥不繼晏如
也旣成進士選庶吉士丁母憂歸學者踵至於柘城東
門外創朱陽書院倡導正學于時四方學者自嵩陽外
獨朱陽爲盛矣服除入京授檢討 聖祖命諸翰林
作楷書敏修書學宗孔孟治法堯舜而其要在慎獨尋
以父老乞歸日與朱陽學者優游講習溫故知新沛然
自得立家規著孝經闡義事親庸言多切於內行頃之

無疾坐逝

蘇門一滴泉其澤滿河雒耿西而竇東人師繼以作流波被
彈丸詩書潤藜藿肫然門內修曾閔庶無忤

教諭蔡璧君宏

福建漳浦人貢生

君宏爲諸生嗜學有介節康熙四十五年授羅源教諭
慨然歎曰天下之治亂在人才人才之盛衰由學校學
校之責任在師儒吾其苟焉而已乎教士先器識後
文藝讀書以反身體認爲要春秋祭文廟躬親莅牲潔
豆籩故事報父母喪者納白金乃爲具牒君宏曰誰非
人子忍以人之親死爲利乎遂除之尋乞歸張清恪巡
撫福建開鰲峯共學兩書院延君宏爲之師集諸生訂
先儒遺書屬君宏總其成已而欲薦之朝以衰老力

測海集

卷五

七

辭乃止家貧清恪欲有贈先開其端輒應曰家無幾人
此閒月給足用也乃止居三年從學者日衆清恪去任
時仍以院事爲屬旣還家爲諸子授諸經大義點次通
鑑綱目未竟而卒

儒官尸厥職官牆競錐刀涼涼蔡先生月出蒼山高明德馨
籩豆清風謝于旄紫陽有心法皓首重焚膏

河督陳鵬年北溟

湖廣湘潭人康熙三十年進士諡恪勤

北溟知江寧府廉幹持法平常州知府與諸生訟文致
十餘人于死北溟會訊雪其寃總督阿山欲增地丁銀
耗羨充公費北溟力持不可事遂寢總督由此大恨之
以前在河工事被吏議又以北溟嘗逐羣娼建亭其地

與吏民講演

聖諭爲大不敬論死俄而召入修

書武英殿復以兩江總督邵穆布薦出知蘇州府蘇大疫北溟巡視所屬境人予之藥餓者予之粟及錢所至疫立起敏于聽斷無畱獄逾年蘇州大治詔權江蘇布政使總督噶禮與巡撫有隙因并怒北溟借承轄屬官踰限劾罷之會噶禮敗仍召入充武英殿纂修總裁康熙六十年命視南河權河道總督晝夜河上築馬營隄塞秦家厰決口尋卽眞以勞卒江南人祀之以配海忠介焉

聖皇達四聰廉吏安可殺肫肫保赤心坦坦固窮節校書感零露策馬衝朔雪以配海剛峯二華天際傑

測海集

卷五

七

尚書楊名時賓實

江南江陰人康熙三十年進士諡文定

賓實初官翰林從李文貞講學尊聞反躬施于上下忠實不欺用文貞薦提督順天學政任滿防河江南尋

召入授直隸巡道廉察稱最康熙五十八年遷貴州布政使明年擢雲南巡撫會征西藏大師駐省城賓實建屋百數十間以處之堅明約束民用不擾滇民丁役不均有戶絕者責人爲代或一人兼數丁又額征外加派公件銀歲三四十萬民苦之至是始均丁于田減公件銀爲十一萬有奇民困大蘇其他利民事次第舉行雍正三年晉兵部尚書總督雲貴明年改吏部尚書管雲南巡撫事六年或誣奏賓實與按察使江芑迪同欺蔽

狀 命官卽訊落職羈雲南對簿暇與諸門人講授如平時獄成擬絞 詔特原之十三年以 遺詔起禮部尙書兼國子祭酒明年二月至京雍正末黔中苗亂連年不能定賓實力言用兵非策 詔從其議撤兵除新疆之賦黔人以寧未幾病卒祀賢良祠

楊公德如玉忠信廉以溫孚尹貞萬變精神化祥雲籌邊擇遠計服食惟斯文 三朝眷終始一氣旋陽春

總督高其倬章之

鑲白旗漢軍康熙三十三年進士諡文良

康熙五十九年章之以內閣學士出爲廣西巡撫鄧橫苗叛章之單騎入寨諭以朝廷威德衆棄刃羅拜受約束而還 世宗登極遷雲貴總督時用兵西藏章之

測海集

卷五

七六

以中甸爲進藏咽喉地請調鶴麗劔川兵鎮之墾田陸涼州積穀以備運改哀牢土司爲流官苗人蠢動章之遣兵迎剿大小三十二戰平魯魁茅洞諸寨逆渠次第就擒雍正三年冬調浙閩總督時福建饑章之入浙境卽請撥溫台倉穀七萬石運閩寬臺灣米禁以濟漳泉從之閩人大安移興泉道駐廈門設哨船彈壓苗夷平生番阿密氏之亂捷聞 世宗喜曰卿在閩朕無南顧憂矣五年冬 命專督福建八年夏調兩江總督會雲南普思苗反貴州廣西猺猓多響應九年秋奉 命總督三省率提督蔡成貴等討平之十一年還兩江權江南巡撫乾隆元年改湖南巡撫章之爲人淵深喜愠不

見于色進止凝重治事勤胸摩文案肉胼起與人甚怒
屬吏有才者往往代爲受過至遭責譴不悔累任盤錯
不喜功不釀亂奏刀砉然關節開解故其所至人咸懷
之三年以戶部尚書召卒于寶應

高公重如山所鎮畢妥帖泊然兵革間屹屹治文牒兼容了
不猜一氣春溫澗勿翦有餘思嗚咽過江楫

總督滿保臯山

姓覽羅滿州
正黃旗人

康熙五十年臯山巡撫福建首劾提督暴橫者殲諸劇
賊益勸農桑備荒禳尋遷浙閩總督整飭營伍擇將吏
相視險要設兵置守六十年臺灣民朱一貴反聚眾數
萬殺鎮將焚府治臯山聞警卽單騎往廈門密檄水陸

測海集

卷五

五

官兵由海道赴廈門旣集下令分兵三路尅日進賊聞
亦分三路爲備及過澎湖與提督施世驃會師令三路
兵併攻中路入鹿耳門復安平鎮大兵進臺灣賊大潰
適 詔至赦諸脅從臺民多反正遂復府治先是增置
淡水營在臺北界至是賊首北遁遇淡水軍被獲凡七
日臺地悉平請蠲賑以撫灾黎民得安集雍正三年卒
于官

制亂不在武貴決機如神奇哉燎原勢指顧無遺薪安邊首
擇吏治盜先保民寄語後來者未亂須經綸

侍郎馮景夏樹臣

浙江桐鄉人康熙
三十二年舉人

雍正五年景夏官蘇松常鎮泰糧道異時州縣徵糧以

漕費爲名溢額者無禁景夏請每石加漕費六分半給
旗丁半抵州縣修倉應供諸費盡草斛面耗米以部頒
收漕斛式較寬議改小口斛裹以鐵米不得溢巡撫尹
文端先後以聞著爲令民大便之在官每乘小舟冒
風雪潛行所屬境訪治諸倉奸猾吏所部肅然時方定
外官養廉上官以糧道故有羨議無給景夏持不可列
諸羨款悉請革除乃給養廉如他官九年遷安徽布政
使累遷刑部侍郎卒官

貪壑杳無底科斂爲之門悉索媼長官三倍安足論春天忽
霆震碩鼠齊聲吞祇今白頭老猶話使君恩

光祿少卿楊秘靜山

奉天人隸正黃旗

測海集

卷五

十

康熙中靜山官直隸固安知縣故事修永定河秋汎畢
工興時永定道黃賦役錢不均遲延及冬朝涉者股戰
靜山憐之許日出後下鏹黃巡工遲民之來欲管之靜
山力爭不得乃直前牽其馬至凍處曰公能往民亦能
往此時日高春公重裘尙瑟縮乃責此赤脰者戴星來
耶黃大恚將繕牒劾靜山會巡撫李文貞公過柳家口
聞之召謂曰汝年少能然古之任延也勞以酒解裘衣
之事得釋調宛平 聖祖巡畿南過固安老幼爭乞

畱靜山

聖祖曰別與汝固安一好官何如一女子

對曰何不別以好官與宛平耶

聖祖大笑以爲誠

許食知州俸知固安縣尋遷雲南曲靖府調麗江麗江

故苗地中甸新歸版籍靜山召土官爲典史諸里魁以
頭目充令人樹榆一本畝畜水一溝建文廟定婚喪之
制期年歲熟俗爲一變民飾廟以祀號第一太守祠累
遷西安布政使署湖北巡撫調四川乾隆初以言事罷
官七年起甘肅涼莊道遷光祿寺少卿致仕歸

好官若珍珠得者懼或奪誰能厘如傷太息此無褐春榆映
簷低秋水衝渠活迢迢闇昧區天日一朝豁

左都御史沈近思位山

浙江錢塘人康熙三十九年進士諡端恪

位山年十歲從師學輒疑仁是何物旣長讀程朱書渙
然有得深信力行踐履日篤始授河南臨潁縣潔已勤
民修荒政建社倉七所築孔家隄扞水患擢廣西南寧

測海集

卷五

三

同知引疾歸朱文端巡撫浙江薦之召入監督本裕

倉會臺灣用兵總督滿保請諸朝俾攝府事雍正元年

還京授文選司郎中越歲累遷至吏部侍郎時山西巡

撫諾敏上耗羨歸公之奏下廷臣議位山言耗羨爲額

征所餘本無定數今歸公則與額征無異日久滋弊耗

羨之外必復加耗羨是重困民也爭之甚力世宗

以耗羨惟無定數故不肖有司取民無制遂著令以加

一爲率提解司庫兼采位山言凡民間公事仍許用耗

羨不得與正供比其有額外加收及私派民間者罪之

五年擢左都御史卒於位生平論學誦法當湖陸清獻

公輯其遺書爲十四卷其言論施設亦彷彿似之

眇志測元始潛淵茂靈根挺霜骨正直排天門披腹抒
遠慮和羹奉 明恩景行未寥闊當湖薦芳蓀

侍郎魏定國步于

江西廣昌人康熙四十五年進士

步于知湖廣應城縣有賢聲鄰縣訟者爭往就決上官
知之遇有變輒檄步于往雲夢孝感二縣人爲有司所
虐閉城罷市他官往不得入及步于至民望見銜牌謹
曰魏青天至矣皆羅拜尋解散事 聞擢冀州 世

宗登極遷知杭州豁浮糧屏盜賊戢旂兵巡撫黃叔琳
獲罪或言叔琳弟叔璈爲御史巡臺灣過杭擾民民罷
市 詔將軍總督會訊訊曰觀者如堵牆叔璈囚服噤
不語將軍呼三木脅之步于牽錢塘令厯階上抗聲言

測海集

卷五

三

曰府縣司地方市罷府縣不知請先劾府縣且闔
城老弱萬千在庭下辱將軍一問有無立剖安用刑爲
將軍目外望諸百姓匍伏同聲應曰如府君言叔璈遂
得釋汪景祺以謗誅誅子女坐流一女許配中表上官
以無媒欲坐之步于爭曰中表爲婚安用媒除其名遷
河南按察使調直隸與布政使張适拷人致死謫戍黑
龍江先是兵部尙書傅爾璫焉一夕夢魏徵來訪翼曰
步于至亾何同步江上一丈夫來汲熟視步于曰非魏
公耶曰然因伏地叩頭流涕曰民冀州人也從人爲盜
事敗度必死公爲減流故得有今日公不記耶傅直前
握手于手曰法人而人不怨又見德焉公孔明也豈直

魏元成哉

上元年與楊名時魏廷珍等同

召見

授西安按察使累遷安徽巡撫入爲刑部侍郎調吏部
以老乞歸

堂堂魏青天應手解紛結直由忠信孚匪獨肝膽決江頭汲
者誰憶往空嗚咽千秋夢中人握手難爲別

侍郎蔡世遠聞之

福建南靖人康熙四十八年進士諡文勤

聞之少厲志節篤內行釋褐後家居主鰲峯書院以正
學造士設族規置大小祭田孤嫠老疾月有常餼酌損
朱子家禮化於其鄉環所居三百家二十年無博戲者
雍正初 召入侍今 皇帝講讀授編修五轉至禮
部侍郎每進講于經史要義修己治人之道必極意盡

測海集

卷五

三

言發于至誠切深無顧慮未幾卒于位天下惜之

東風上桃李葉葉同一春君子懿文德薰者知其醇翊我太

平運

潛龍醞經綸一朝首庶物雷雨信如神

學士惠士奇仲孺

江南吳縣人康熙四十八年進士

仲孺湛深漢學於易禮春秋俱有論說督學廣東六年
以經術造士 召還進對不稱 旨罰修鎮江城舟中題詩

寄子命棄宅田輸縣官復爲書曰猶記康熙六十一年

秋歲試初畢還省城與將軍管源忠巡撫楊宗仁燕語

管謂子曰老先生不名一錢固善萬一日後奉 旨

當差如之何楊正色曰天理可憑汝無此事吾能保之

子搖首曰保不得保不得楊愕然曰何謂也子曰男兒

墮地時死生禍福已前定萬一吾命當死公能保我不
死耶君子惟潔乃心盡厥職而已他非所知也管左右
顧笑曰好漢好漢予當時已料及此事君能致其身卽
粉骨分所不辭倘有幾微難色便非好漢汝當仰體我
心歡欣鼓舞以樂飢寒則我快然無憾矣以產盡停工
削籍乾隆元年復侍讀致仕歸卒廣東人祀之韓山以
配昌黎子棟能世其學

男兒有赤心榮辱非君相歡喜忍飢寒篷窗發高唱作人配
韓文傳經緬劉向千秋紅豆居寥廓青雲上

惠氏有紅豆山房

侍郎胡煦滄曉

河南光山人康熙五十二年進士

滄曉治易究圖書之蘊著函書數十萬言旣入翰林

測海集

卷五

七

聖祖屢召見問爻象疑義命畫圖講說歎曰真苦

心讀書人也雍正中官兵部侍郎轉禮部嘗請舉孝弟
詳農政廣言路定制度九年奏河南水災與總督田文
鏡忤文鏡奏滄曉嗣子胡基孟本異姓不當冒官卷中
詔斥基孟滄曉亦落職歸乾隆元年入覲復原官
致仕并復基孟舉人滄曉尋卒于京師

學易體仁者言行謹機樞颺言普美利萬象當昭蘇進講緬
宣室正誼追江都光山好風日滴露披遺圖

御史謝濟世石霖

廣西全州人康熙五十二年進士

石霖官御史雍正四年十二月劾河南巡撫田文鏡貪

賊壞法時世宗方倚任文鏡而廣西巡撫李紱入

見奏文鏡舉劾失平 詔遣大臣卽訊還奏敘言非實

世宗疑石霖或受指使 命怡賢親王與大學士

九卿嚴訊之究指使者石霖曰文鏡之惡中外共知之

濟世幼讀孔孟書粗識事君之義不忍視姦人挾私罔

上故冒死以 聞必欲究指使者乃獨有孔子孟

子耳詰責再四無異辭拷掠急石霖大呼 聖祖仁

皇帝王及諸大臣皆瞿然起立罷訊入告曰是狂生妄

欲爲忠臣口刺刺稱孔孟不休終不言有指使者

世宗意亦解曰是欲爲忠臣且令從軍去遂 命往阿

爾泰軍前効力乾隆初 召復故官尋以母老請外轉

出爲湖南糧儲道七年爲巡撫許容所劾御史胡定白

湖海集

卷五

五

其寃明年春 上命禮部侍郎阿里袞偕定往訊得

白遂斥許容改石霖驛傳鹽法道尋又爲巡撫所劾免

歸

嶽嶽一狂生唯識孔與孟霆聲發堂皇大官拱而聽薄譴荷

殊恩全歸拜 新命還憐末路艱未改凌冬性

布政使陳德榮廷彥 直隸安州人康熙五十一年進士

廷彥爲諸生與博野尹元孚切劘正學有經世之志旣

成進士授湖北枝江縣修百里洲隄除解餉入川雜派

遷黔西州以憂去服除引 見 命赴貴陽權威寧知

府踰年威寧改州升大定爲府以廷彥補之會烏蒙土

司叛東川鎮雄附之威寧當其衝上官檄廷彥往督有

司完守備城西陴頽聚民閒米桶實土石累丈餘加雉
堞焉不日而功成賊去城三十里縱火牛光燭天廷彥
督士卒晝夜臨城賊不敢逼會哈元生兵至賊敗遁以
江西巡撫薦攝饒九道督潯陽大孤兩關宿弊盡革復
以經略張公薦授貴州按察使乾隆初苗疆新定方駐
師興屯將吏多鋒銳言著未已二年正月貴陽大火廷彥
入見經略曰天意如此當設誠修省苗亦人耳可盡殺
乎經略大感動申戒諸將吏如廷彥言攝布政使以黔
地瘠薄築壩堰引山泉溉田導以含洩之法不數年貴
筑貴陽開州威寧餘慶施秉開報墾田三萬六千畝督
民種桑募蠶師教之蠶開野蠶山場百餘所比戶機杼

測海集

卷五

三

聲相聞修學舍繕城垣恤流民給孤老益囚食進諸生
開以爲己之學自立志始尋改安徽布政使建陽明書
院以造士卒於官

吏道亦有基所貴足衣食陳公洞民依率作無餘力一言扇
仁風指顧安反側翹首古陽明

洞名逝者何終極

10909

